

## Sing vooraf staande: Psalm 72:6 (p. 361)

- 6 Ek sien al vorste, ryk en magtig, / wat buigend voor Hom staan,  
en al die nasies wat eendragtig / Hom dien as onderdaan.  
Want Hy sal die verstoteling, / die wat geen helper het –  
die stilverloorne en geringe – / sal Hy verhoor en red.

Ons hulp is in die Naam van die Here wat die hemel en die aarde geskape het.  
Geliefdes, genade en vrede vir u van God ons Vader en die Here Jesus Christus deur die kragtige  
werking van God die Heilige Gees.

**Amen.**

## Lofpsalm 98:1 (p. 488)

- 1 Sing nuwe lof aan God die HERE, / die God wat wonders het gedaan;  
sy regterhand, vol sterkte en ere, / sy heil'ge arm bring redding aan.  
Hy het sy heil en alvermoë / die volkere alom gemeld;  
geregtigheid blink voor hul oë / soos sonnestrale oor berg en veld.

## Geloofsbelydenis: Apostolicum

*Na die wet sing ons Psalm 25:6 (p. 117).*

Wet

## Psalm 25:6 (p. 117)

- 6 Wie's die man wat hier benede / in Gods vrees sy weg wil gaan?  
God sal self sy wank'le skrede / voortlei in die regte baan.  
Al wat goed is, sal Gods hand / hom in stilheid laat verwerwe;  
en die lank beloofde land / sal sy nageslag beërwe.

Gebed

- **Doksologie:**
- **Aanbidding:**
- **Skuldbelydenis:**
- **Vergifnis:**
- **Dank:**
- **Smeking vir die nood van die gemeente en voorbidding vir die kerk,  
owerhede en sondige wêreld, asook die beroep op die beloftes van God:**
- **Algemene bede:**
- **Verligting van die Gees ter wille van die Woorddiens:**

Amen.

## Psalm 107:10 (p. 535)

- 10 Laat hul met offerande / die HERE loof en dank,  
die werke van sy hande / vermeld met klare klank;  
laat hul Hom dank bewys / vir redding wat so soet is,  
Hom met hul offers prys, / omdat Hy groot en goed is.

Skriflesing: Handeling 28

Teks: Handeling 28:4, 5

**En toe die inboorlinge die dier aan sy hand sien hang, sê hulle vir mekaar:  
Hierdie man is beslis 'n moordenaar wat die goddelike wraak nie laat lewe nie, al  
is hy uit die see gered. Maar hy het die dier in die vuur afgeskud en geen kwaad  
gely nie. (Handeling 28:4, 5 AFR1953)**

Alles wat hier op Milete gebeur, is 'n magtige preek van God se genade.

- Hier is magte aan die werk –
  - magte wat die dood probeer veroorsaak en so alles vernietig, en
  - magte wat die lewe wil beskerm.
- Al die gebeurtenisse is 'n stryd teen die dood – maar dit vertel van 'n ander oorlog wat om ons  
woed tussen die ewige lewe en die ewige dood.

Elke mens het 'n groot begeerte om te bly lewe. Ons smag daarna.

- Maar dit is 'n dieper behoefte as om net op die aarde te lewe. Ons wil ná die dood ook lewe.
- God preek aan ons dat ons nie hoef te vrees nie.
  - Hy het reeds die Here Jesus Christus gestuur wat die dood vir ons oorwin het.
  - Hy waarborg vir ons dat ons sal lewe in God se koninkryk.

Dit is die lewensewangelie wat hier op Milete gepreek word. Die ewangelie van lewe deur die Here Jesus Christus.

Paulus is op pad na Rome. Die hele reis is vol van die doodsmag wat God se kinders aanval en die voortgang van die ewangelie probeer keer.

- Ons lees van 'n storm wat op die see woed.
- Die mense op die Romeinse bootjie is paniekerig – almal is met doodsvrees oorval.
- Al die vrag wat op die boot was, is al in die see gegooi.

Dan verskyn die engel van die Here aan Paulus:

**En hy het gesê: Moenie vrees nie, Paulus; jy moet voor die keiser staan, en kyk, God het aan jou geskenk almal wat saam met jou vaar. (Handelinge 27:24 AFR1953)**

Die twee magte teen mekaar – lewe en dood. So kom Paulus en sy geselskap op Milete aan.

- Druipnat en ternouernood aan die dood ontkom, staan hulle daar op die strand.
- Die lewe het oorwin.

Maar hulle kom ook op so 'n manier op Milete aan dat dit lyk asof die gesant van God onwelkom is.

- Eintlik was hy onwelkom, want die satan wou hom nie daar hê nie omdat hy Paulus wou verhoed om die ewangelie aan hierdie mense te verkondig.

Die inboorlinge ontvang hulle hartlik en vriendelik.

- Daar word 'n groot vuur aangepak om hulle te verwarm en droog te maak.
- Dit lyk asof die inboorlinge dit spontaan doen, maar die magte is weer aan die werk, en die God van lewe het reeds hier oorwin.

Dit was nie in die aard of volgens die gebruike van hierdie inboorlinge om mense wat as drenkelinge uit die see kom, so mensliewend te ontvang nie.

- Hulle het sulke mense aangeval en hulle beroof van al hulle besittings en hulle dan as slawe gebruik of verkoop.
- Maar in plaas van die gewone vyandigheid word hier 'n heerlike warm vuur gemaak vir die drenkelinge.

Die dood is weer aan die werk.

- 'n Giftige adder byt so vas aan Paulus se hand dat dit bly hang totdat hy dit in die vuur afgeskud het.
- Dadelik is ons weer in die atmosfeer van doodsverwagting – die mag van die dood probeer weer om Paulus en sy ewangelie uit te wis.

Dit lyk ook of dit wil werk, want dadelik sê die barbare dat Paulus 'n moordenaar is.

- Hulle het 'n godin met die naam van Dikê, en sy straf alle moordenaars.
- Paulus was net gelukkig om lewendig uit die see te kom, maar hy sal nie die wraak van hulle afgod ontvlug nie.

Die satan maak die mense dadelik teen Paulus op sodat hulle ook niks goeds van hom moet glo nie.

- Almal wag in spanning.

- Daar gebeur niks.
- Paulus bly lewe.

Die gebeurtenis is so snaaks dat die plan van die satan presies die teenoorgestelde bereik as wat hy graag wou.

- Hy wou hê dat die mense aan Paulus moes twyfel, en hy wou Paulus laat sterf.
- Maar nou bly Paulus lewe, en in plaas daarvan dat die mense teen hom moet wees, dink hulle nou skielik dat hy 'n god is.
- Hulle is nou twee keer meer bereid om te luister na wat Paulus te sê het as wat hulle voor die tyd was.

So gebruik die Here elke keer die duiwel om sy raadsplan te bevorder.

Maar ons is nog nie van die dood ontslae nie.

- Die vader van Publius lê siek aan buikloop.
- Vir daardie mense het dit net een ding beteken: die dood.
- Hierdie siekte was vir hulle ongeneeslik, en almal wat dit opgedoen het, het gesterwe.

Weer die atmosfeer van doodsverwagting.

Die goddelike wonder bly egter nie uit nie, want Paulus het by hom in sy huis gegaan.

- Nadat hy gebed het om die krag van God, het hy die sieke die hande opgelê en hy het gesond geraak.
- Hy maak ook ander siekes op die eiland gesond.

Dit gaan egter nie om Paulus as mens nie, maar om Paulus as die gesant vir die lewe.

- Hy is die dienskneg wat God stuur om sy werk te gaan doen.
- Hy kom op die eiland om die plek en sy mense te verryk met die evangelie van lewe.
- Alles wat die duiwel tot nadeel van die evangelie wou gebruik, verander die Here nou so dat dit die evangelie bevorder.

Die slang gee die deurslag.

- Dadelik is dit vir die inboorlinge duidelik dat hier 'n god aan die werk is wat hulle bygeloof heeltmaal oorskadu.
- Paulus praat baie keer van "die God aan wie ek behoort". Hy sou dit sekerlik ook aan hulle gesê het.
- Sodoende hoor hulle van die lewende God.

Dit is 'n wonderlike gebeurtenis vir die mense van Milete.

- Die wonderlikheid lê daarin dat hulle nou vir die eerste keer werklik met God te doen het wat mag het oor die dood.
- Dit is dus 'n wonderbesoek aan Milete, waarin die evangelie van lewe oor die dood triomfeer.

Dit is tog so duidelik dat God self hier op Milete preek. Daarna volg daar die seëninge op die prediking.

- Almal kom in beweging.
- Die inwoners van die eiland bring voedsel en klere.
- Maar die werklike groot vraag is dit: Gee hulle werklik hulle lewens aan Jesus Christus?

Die gebeurtenisse op hierdie eiland het ook vir ons iets te sê.

- Dit leer ons van die finale oorwinning oor die dood.
- Dit profeteer vir ons dat die seën wat vir ons uit Jesus Christus se kruis voortkom, die finale oorwinning oor die dood sal wees.

Paulus oorwin siekte.

- Net soos wat die mense wat deur hom gesond geraak het, bly lewe, so oorwin die Here Jesus Christus vir ons die dood en die sonde dat ons in die ewigheid kan bly lewe.
- Dit wat hier op Milete gebeur, is tog so min van die werklike evangelie, want hier word nie eers die helfte gepreek van wat die evangelie werklik vir ons beteken nie.
- Paulus kon met sy prediking die dood maar net tydelik oorwin, want al hierdie mense wat die dag op Milete was, is vandag almal dood.

Maar die betekenis daarvan vir ons is dat die dood vir ons ook oorwin word, maar só dat ons vir ewig in die koninkryk van God kan bly voortlewe.

- Dit leer ons dat die doodsmagte eendag almal finaal vernietig sal word.
- Maar dikwels aanvaar ons nie die seën wat ons hierdie genade besorg nie. Hoeveel keer lees ons nie dat Paulus van 'n plek af weggaan en dan bly daar van sy prediking niks oor nie.

Weet ons almal regtig wat dit is om hierdie evangelie van lewe te aanvaar?

- Dit kan so maklik gebeur dat die satan ons blind maak sodat die volle vreugde van die ewige lewe vir ons verborge bly.
- Ons moet ons geestelike blindheid voor God bely, en Hom bid om ons daarvan te verlos.

Ons moenie soos die heidene van Milete net na uitwendige wonders kyk om ons van die evangelie van Jesus Christus te verseker nie.

- Hulle was heidene. Ons is nie. Ons weet van beter.
- Maar nogtans werk al die magte wat op Milete gewerk het ook nog elke dag met ons.
- Die mag van die dood wat alles probeer afbreek, sal tot op die laaste dag toe probeer om ons van God te vervreem.

Die mag van die lewe is met ons.

- Dink daaraan hoe God ons lewens onder sy genade rig en lei.
- Dink daaraan hoe God die Heilige Gees ons steeds met Goddelike wysheid deur al die donker kolle in ons lewens gevoer het.

As ons oorwinnend teen die sonde kan bly stry, vergeld God ons met die ewige lewe waarvan Hy ons op Milete geleer het.

**Amen.**

Slotgebed

Slotpsalm 145:5, 11 (p. 696)

- 5 Hul sal, o HEER, u goedheid bly herdink / en vir u heil die jubels op laat klink:  
genadig, goed, lankmoedig soos weleer, / barmhartig en 'n redder is die HEER.
- 11 Hy gee die wens van almal wat Hom vrees; / op hul geroep wil Hy 'n redder wees.  
Sy hand verdelg die goddelose, maar / die wat Hom liefhet, sal die HEER bewaar.

Die genade van die Here Jesus Christus en die liefde van God en die gemeenskap van die Heilige Gees bly by u almal.

**Amen.**